

國史列傳

滿漢大臣列傳

卷七十七

趙秉冲

黃標

蔡攀龍

馬瑜

徐端

金應琦

趙秉冲江蘇上海人父戶部主事文哲隨將軍溫福征金川乾隆三十八年殉難入忠義傳四十四年奉

旨繕寫篆字監生趙秉冲著照從前陳孝泳楊瑞蓮之例在懋勤殿行走四十七年

諭曰監生趙秉冲在懋勤殿行走四年著加恩賞給中書遇缺卽補仍准其一體會試四十八年補內閣中書五十四年十月諭曰內閣中書趙秉冲現已俸滿以主事用尙未得缺該員在懋勤殿行走年久頗爲勤慎著加恩以戶部主事補用十二月上以秉冲辦理石鼓篆文應書銜

命以戶部員外郎補用五十九年陞兵部郎中六十年擢湖廣道御史嘉慶二年遷戶科給事中三年授鴻臚寺少卿四年三月授內閣侍讀學士四月

諭曰內閣侍讀學士趙秉冲在懋勤殿行走有年學問尙優人亦謹慎著照陳孝泳之例同南書房翰林一體行走五月轉太僕寺少卿五年轉大理寺少卿六年轉光祿寺少卿七年二月轉太常寺卿七月

上巡幸木蘭秉冲隨圍

命射中箭五枝

賞戴花翎八年四月

賞給兵馬司衛衛官房一所十二月授通政使九年二月

上臨幸翰林院用唐張說東璧圖書府五律字各分一字賦詩秉冲與焉分得醉字十年五月授兵部右侍郎十一年調戶部左侍郎十三年

上巡幸淀津

回鑾秉冲呈進詩冊

賞紗二端十四年十月

皇上五旬萬壽秉冲呈獻詩冊

賞大卷八絲緞二端大小荷包及筆墨紙硯各件十二月書吏

王書常等僞造印文冒領庫銀秉沖失察五次部議降一級調用

上加恩改爲降二級留任十七年五月

頒賞各大臣

御製河復誌事詩墨刻內溜字誤寫驢字秉沖以不能敬謹校正檢舉筆誤自請議處並賠繳工價

諭曰趙秉沖於刊成頒賞之後始看出筆誤檢舉實屬疎忽著拔去花翎毋庸交部議處所有此次墨刻石料紙墨工價仍著全數賠繳是月調戶部右侍郎管理錢法堂事務十八年署行在兵部左侍郎十九年三月因病乞假並請開缺

上以秉沖年力正強偶感時疾自易痊癒令其安心調養不必開缺四月卒

諭曰侍郎趙秉沖在內廷行走三十餘年勤慎供職前因患病請假諭令安心調理茲聞溘逝深爲軫惜昨已賞給陀羅經被著再加恩賞給廣儲司庫銀三百兩經理喪事照侍郎例給予卹典所有任內一應處分悉予開復子榮現官翰林院庶吉士

林候選兵馬司指揮

黃標廣東潮州人由行伍拔補千總乾隆四十六年擢香山協左營守備五十五年署本協右營都司二月總督福康安委標帶兵赴龍門洋面緝捕獲洋盜吳盛昌等五十八年補碣石鎮標右營都司五十九年署廣海寨遊擊六十年在沙底黑水雞頭外洋等處均捕盜有功嘉慶元年十一月於南澎外洋首先射斃匪船舵手復督率弁兵擒獲洋盜李超勝等三十八名上以其緝捕奮勉嘉之旋擢海門營參將二年緝獲洋盜胡三勝鄭亞六王亞大陳阿勝等多名又擊斃夷洋盜首並全獲夥盜得

旨從優議敘三年三月陞廣東澄海協副將六月陞廣東左翼總兵

諭曰黃標自由參將題陞副將爲時無幾資格甚淺因該員在粵三十餘年出洋捕盜著有勞績是以特加恩陞擢此係破格殊施傳諭該鎮到任後務須倍加感奮認真緝捕洋面一律肅清方爲不負獎擢倘始勤終怠此後仍有洋匪滋事惟該總兵

是問四年圍搜大放鷄山及雙魚桅夾門外洋均有殲獲五年
諭曰黃標在洋面帶領兵船不避風濤認真緝捕頗屬出力著
賞戴花翎三月兩廣總督吉慶奏夷洋盜船竄入廣東北額港
內劫去鹽船二十洋面疎防各員請交部議處

諭曰黃標係總統之員亦難辭咎但念該鎮平日在洋捕盜尙
屬認真著加恩免其議處六年於果洲南澎外洋拏獲田亞猛
黃廣文等並匪船礮械七年帶兵赴廣東博羅等處地方勦捕
會匪偕提督孫全謀攻破羊屎坑羅溪營等處賊巢共擒斬三
千餘人奏入

諭曰黃標身先士卒殺賊立功該鎮係武臣於失察地方會匪
處分較之文職本輕今又能奮勉打仗迅搗賊巢殊屬可嘉著
交部從優議敘並

賞玉搬指及荷包等件會匪平仍回洋面偵巡八年九月

諭曰總兵黃標等督率兵船在洋捕盜數月之久未獲一賊緝
捕不力著交部議處尋議革職留任十一月卒

蔡攀龍福建同安人由行伍拔捕水師把總陞千總乾隆四十

七年陞閩安左營守備四十九年陞海壇右營遊擊五十年調澎湖右營遊擊五十一年臺灣奸民林爽文糾衆滋事巡撫徐嗣曾檄攀龍帶兵赴軍營調用五十二年正月鳳山被陷總兵柴大紀飭令帶兵往南路勦捕賊匪分路犯臺灣郡城攀龍連日打仗得勝賊匪由南擁至復率兵民奮勇截殺殲斃多名經徐嗣曾奏入

上嘉之

命事竣後送部引見二月賊匪三四千窩聚西園莊地方攀龍偕參將瑚圖里副將丁朝雄分三路攻之鎗斃三百餘名三月總兵郝壯猷奏鳳山克復派攀龍入城安民防守旋赴南路進勦復調回郡城堵禦時因鳳山復陷賊犯府城總督常青派攀龍偕游擊孫全謀黃象新等帶兵分營堵勦賊衆五六千撲府城東南二門攀龍等督兵力戰自辰至未鎗礮擊斃五六百名奪獲九節礮一座四月常青奏請陞補北路協副將

諭曰遊擊蔡攀龍前據孫士毅奏稱聞伊帶兵打仗頗爲賊匪所畏今據常青奏稱該遊擊於防守郡城歷經打仗無不身先

士卒且能審度機宜弁兵用命義民悅服是以屢次均獲勝仗殲斃甚多甚屬奮勇出力宜加恩擢著照常青所請卽超補臺灣北路協副將賞戴花翎若再能感激奮勇打仗俟續有總兵缺出卽奏請陞補以示獎勵六月南路賊匪糾約七八千圍繞大營三面攀龍等奮勇督戰施放鎗礮弓箭斃賊三百餘名賞給健勇巴圖魯名號七月陸路提督柴大紀在諸羅城被圍常青派攀龍偕副將貴林參將孫全謀帶兵由水道前往援應八月

諭曰蔡攀龍自到臺灣屢次奮勇殺賊著有勞績甚屬可嘉所有海疆鎮總兵員缺卽著蔡攀龍補授並著常青傳諭蔡攀龍令其加倍奮勉現在帶兵援應諸羅務將府城及諸羅一帶屯聚賊匪悉力勦除廓清道路使糧餉火藥隨同官兵運送接濟尋總督李侍堯奏據知府楊廷理稟稱本月十七日蔡攀龍等抵鹽水港分隊前勦遇大雨賊乘勢包圍幸柴大紀帶兵接應入城又探得諸羅之兵復自諸羅打出以通道路九月奉旨柴大紀調水師提督蔡攀龍補授陸路提督並

命授爲參贊尋李侍堯奏接常青來札並將參贊恒瑞摺稿寄來蔡攀龍等抵諸羅後仍未能殺出將軍福康安奏攀龍救援諸羅會同遊擊楊起麟等前進行至湯元店被賊阻截惟攀龍孫全謀遊擊邱能帶兵七百名到縣其餘多有損失十二月福康安奏攀龍到羅諸後在西門外筍營彼時兵力已疲祇能防守並無復自諸羅殺出打通道路之事前因郡城消息阻隔知府楊廷理率以傳聞之辭具稟李侍堯卽稱諸羅圍解據稟入告今臣確切查明復傳攀龍面加詰詢因係損失多兵賊仍不能解攀龍據實陳明懇請革職觀其人尙奮勉且籍隸泉州情形亦頗熟悉可否酌留海疆鎮總兵原任令在軍營効力諭曰蔡攀龍前此應援入城雖未能帶兵出城勦殺賊目但伊屢次與賊打仗奮勇出力業已加恩擢用提督其過尙可寬免尋福康安攻破大里杙賊巢諸羅圍解五十三年正月柴大紀逮問攀龍調水師提督官兵進勦南路賊匪搗大武壠賊巢福康安派令攀龍駐筍灣里溪進逼時首逆林爽文就擒其弟林勇及賊目莊大田在郡城一帶出沒並令牛莊賊匪攻擾灣裏

村莊希圖斷截郡城要路福康安令攀龍帶兵前往與官兵分
路進攻殲斃多名仍令攀龍駐劄灣裏巡防石仔瀨三月大功
告竣圖像紫光閣

御製贊曰臺灣戰將巨擘惟茲向嘉大紀乃被所欺賞罰各當
弗濫弗遺惟明克允奉三無私六月

諭曰福建水陸兩提督其水師員缺所轄皆係外洋地方責任
尤重而現任提督蔡攀龍詢之由軍營回京大臣侍衛等僉稱
其人平庸福康安前亦奏其未能勝任若令其久任海疆恐有
貽誤朕意陝甘二提督哈當阿蘇靈俱尙能事近年甘省地方
寧謐蔡攀龍至彼尙可將就勝任並著福康安於哈當阿蘇靈
二人內量其才具孰與水師員缺相宜者奏聞調補七月
諭曰蔡攀龍著來京引見再降諭旨時江南狼山鎮總兵出缺
上命攀龍暫行降補五十八年江南山東交界之黑水洋有盜
劫各案江蘇巡撫奇豐額奏派攀龍會同山東登州鎮總兵恩
特黑默親往查勘

諭以毋得諉卸六月攀龍奏報收成分數於出洋會勘一事並

未提及得

旨該鎮實力查察毋得推諉取咎尋奏於六月十五日前往會同恩特黑默出洋會勘並自請交部嚴加議處

諭曰蔡攀龍此次如果能帶同事主船戶舵工人等將各案失事洋面地方孰爲江南所轄孰爲山東所轄逐一秉公確指不少存回護遷就之見其自請嚴議處分尙可將功折罪若不能實力查辦定將該鎮等重治其罪九月偕恩特黑默奏勘明黑水洋面情形江南山東以牛車山爲界各立緝盜責成

諭曰恩特黑默蔡攀龍親身查勘遠涉外洋尙屬冒險出力著各賞緞二疋嘉慶三年七月卒

馬瑜甘肅張掖人寄籍四川華陽縣乾隆四十七年以武生効力督標洊陞慶寧營千總五十七年隨將軍福康安出師廓爾喀累功授瀘寧營守備加都司銜六十年閏二月桃桃廳苗匪闌入秀山縣境隨總督和琳帶兵堵剿攻克各路賊寨

賞戴花翎五月擢冕山營都司十月擢督標左營遊擊是月進抵高多寨生擒首逆吳半生下部議敘嘉慶元年

命赴達州軍營二年三月攻克大團包

賞大小荷囊復擊賊于棋盤石奪其卡六月進攻安子坪等處鎗斃首逆並擒其家屬

予達春巴圖魯名號七月迎探賊縱至寧羌州安撫州城三年三月殲首逆齊王氏姚之富於沙狐嶺餘賊竄逸時瑜首先偵探官兵得以分路截剿

上嘉其奮勇擢參將四月勦白號賊高均德於維南六月追擊於鐵釘埡斃賊二百餘名均德與其黨冉文儔等竄踞大神山七月官兵分路進勦瑜攻其東面克之文儔等由龍鳳坪遁走箕山坡下九月克箕山賊匪羅其清退踞大鵬山寨十月合兵圍勦瑜等冒雨攻寨燬其南門鎗斃其父從國其清遁十二月生擒於巴州濛子灘洞中事

聞

詔以陞缺儘先補用文儔自箕山竄入通江之麻壩寨負隅抗拒四年元旦瑜隨副都統德楞泰等分兵三路毀寨而入生擒冉文儔及其子添受並賊黨千餘人奪獲牛馬器械無算加副

將銜三月補四川督標副將七月追賊入楚十月擒高均德於大市川尋赴陝甘勦捕五年正月川北川西賊勢猖獗仍隨德楞泰統兵入川二月攻江油之烏龍寨生擒線號首逆

詔給功牌三月進攻重華堰賊伏於火石壩者萬餘瑜等分路環擊擒首逆冉添元等下部議敘復勦賊于劍州之石門寨賊搶渡潼河瑜偕副都統賽冲阿等擊走之四月追賊至開封廟乘賊搶渡嘉陵江斬殺二千七百餘人殲藍白號賊于麻柳場閏四月勦藍號賊於七孔溪瑜伏兵山下俟賊過溝特擊之五月攻長池壩賊巢得

旨嘉獎六月擢貴州安義鎮總兵七月調重慶鎮總兵八月賊至長壩方渡河瑜領馬步兵掩至白號首逆虔向瑤赴水死九月殲賊於母子壩六年正月逆賊徐添德並黃號股匪自洵陽北竄瑜追至乾溝擒斬甚衆餘匪奔鎮安瑜等領精兵八百名間道出野猪坪雪夜奮擊二月勦黃號賊龍紹周於五里壩復蹴之於官渡河淹溺無算四月黃白藍號賊匪自陝入楚與徐添德合瑜隨德楞泰追擊於陝之黃石坡斬獲二千餘名五月

勦賊于毗河鋪賊勢瓦解徐添德奔仁河灘溺死七月追賊入川敗黃號賊于榮子堽峯竹廠賊走巴東復敗之於雲霧溪九月由老木孔入山搜勦賊西趨陝瑜偕總兵蒲尙佐等冒雪進攻殄龍逆於平利之岳家坪黃號賊匪殆盡十一月殲賊于白果壩賊竄至通江之劉家壩瑜等分路繞上山梁大兵繼進俘獲無算七年二月隨德楞泰至巫山十二峯掃除線號散賊四月勦賊于鷄公梁擒斬千餘五月擊賊于水溝後山堽口擒斬八百餘人六月追擊於觀音碕首逆樊人傑就擒下部優敘十月賊竄施家溝爲老山極險處瑜步行入山督兵兜勦首逆趙鑑等就擒殲青黃兩號賊三百餘於中子洋坪復偵知巴巫接界賊匪聚屯月夜搗其巢穴擒斬之均下部議敘

恩賞撥指荷囊賊勢窮蹙瑜由巫山向北搜勦十一月斃賊于銅盆溪十二月追擊于票子坪等處斬馘百餘擒青號賊于鳳凰山八年正月於黃柏溝及大陽河勦除零匪二月獲白號首逆王三槐之弟三魁於馬家壩餘股零星掃蕩而楚匪復逼入川瑜偕副都統色爾袞合兵迎擊閏二月從間道進攻燈盞窩

雨霧彌漫瑜由山頂衝下斬馘五十餘人隨於豐玉坪天子池
草堂河黑樓門等處沿途搜緝川陝楚餘匪殲除殆盡乃於三
省邊界分段巡防瑜派守川省之徐家壩十月突有陝界伏匪
由南山竄出裹脅漸多因自川東探勦入陝十二月由八義寨
獐鬻崖而進擒斬數十名復躡之於尹家臺子賊恃險抗拒瑜
設伏敗之九年正月擢江南提督留辦善後事宜二月賊竄湖
北之興隆坡瑜督兵兜勦殲斃苟文華等
上嘉之

賞翎管撥指荷囊復追賊於日晒溪魚洞子四月調雲南提督
仍留辦善後事宜六月賊屯柴扒老林瑜偕提督豐伸由添紫
城北進攻賊潛遁經略額勒登保偕德楞泰等奏言添紫城在
賊屯之南最爲緊要專派豐伸馬瑜在彼扼截竟任乘間偷越
實難辭咎

命革巴圖魯名號摘去花翎時餘匪專恃老林奔竄瑜帶兵窮
賊所向七月追攻鳳凰寨有名賊月數殲擒下部議敘八月斃
首逆苟文潤等於魚洞子奏入

賞還花翎及巴圖魯名號九月瑜率將備先後搜獲賊匪陝境肅清仍於川境沿邊分緝尋苟朝九被獲於漢中府全功告竣下部議敘十月檄撤陝西從征鄉勇十年八月赴雲南提督任十五年調江南提督十八年四月調直隸提督七月隨駕熱河

命射布靶中三矢

賞穿黃馬褂九月河南教匪滋事陷滑城

命瑜馳往勦辦十月至滑之留固村殲賊二百餘人於南湖北湖總督溫承惠合兵會勦斃賊五百餘名奪獲鎗砲器械甚多復由道口之運河西岸進兵賊匪淹斃無算

上傳示方略

命瑜偕副都統富蘭由濬縣遶道速赴開州以北逐一搜捕向南進勦瑜等探知滑縣之潘章李家莊袁家莊等處距開州甚近俱有賊屯聚十一月進燬賊巢殲斃二千八百餘人十二月攻復滑城瑜留駐開州搜捕竄匪九百餘人事竣下部議敘尋因失察都司曹綸從賊入教部議革職

詔改爲革職留任十九年二月調江南提督四月以防守東明時失察所屬將弁買帶婦女降補徐州鎮總兵二十二年調山東袁州鎮總兵二十三年

上以其怠忽捕務嚴飭之二十四年四月仍授江南提督六月卒

諭曰馬瑜前在軍營著有勞績著加恩照提督例賜卹諡壯勤徐端浙江德清人由監生援例捐通判乾隆四十七年河決河南青龍岡經大學士阿桂奏派承挑引河四十八年工竣奉

旨留於東河河工委用四十九年題補蘭儀通判五十二年蘭儀以工險改爲同知缺卽陞補蘭儀同知尋又改睢甯通判爲同知缺調端睢寧同知五十七年調開封府下南河同知嘉慶二年湖北邪匪滋事隨河督李奉翰赴均州老湖口防堵江岸出力

賞戴花翎三年署兗沂曹道堵築曹工四年擢江西饒州府知府未到任調江蘇淮安府知府五年十一月堵築邵工賞加道銜七年十一月兩江總督費淳南河總督吳璥以淮徐